

粵雅堂叢書

粵雅堂叢書

呂衡州文集卷第六

三受降城碑銘

并序

夏后氏遏洪水驅龍蛇能禦大蕃以活黔首周文王城朔方逐獫狁能捍大患以安中區若非高岸峻防重門擊柝雖有盛德曷觀成功然則持璿璣而弛張萬象昊穹之妙用扼勝勢以擒縱八極王者之雄圖道雖無外權則有備變化消息存乎其人三受降城皇唐之勝勢者也昔秦不量力北築長城石振臨洮左馳碣石生人盡去不足乘障兩漢之後頽爲荒邱退居河澨歷代莫

進矯亡秦之弊則可矣盡中國之利則不然唐興因循
未暇經啓有拂雲祠者在河之北地形雄坦控扼樞會
虜伏其下以窺域中禱神觀兵然後入寇甲不及擐突
如其來鯨一躍而吞舟虎數步而擇肉塞草落而邊毗
懼河冰堅而羽檄走爰自受命至于中興國無甯歲景
龍二年默啜强暴黷鄰構怨掃境西伐漠南空虛朔方
大總管韓國公張仁愿躡機而謀請築三城奪據其地
跨大河以北嚮制胡馬之南牧中宗詔許橫議不撓時唐
休璟建於是畱及瓜之戍斬奸命之卒六旬雷動三壘
議非之

岳立以拂雲祠爲中城東西相去各四百里過朝那而
北關斥候迭望幾二千所損費億計減兵萬人分形以
據同力而守東極于海西窮于天納陰山于寸眸拳大
漠于一掌驚塵飛而烽火耀孤鴈起而刁斗鳴涉河而
南門用晏閉韓公猶以爲未也方將建大旆提金鼓馳
神算鞫虎旅看旄頭明滅與太白進退小則責琛賚受
厥角定保塞一時之安大則倒狼居竭瀚海空苦寒萬
里之野大畧方運元勲不集天其未使我唐無北顧之
憂乎厥後賢愚迭任工拙異勢剛則黷武柔者敗律城

隳警固寇得凌軼或驅馬飲河而去或控弦劇壘而旋
吾知韓公不瞑目於地下矣今天子誕敷文德稚育羣
生戢兵和親七狄右衽然而軍志有受降如敵大易有
安不忘危崇墉言言其可弛柝亦宜鎮以元老授之廟
勝俾述舊職而恢遺功外勤撫綏內謹經畧使其來不
敢仰視去不敢反顧永讐猛氣無生禍心聳威馴恩禽
息荒外安固萬代術何加焉敢勒銘城隅庶復隍而光
烈不昧銘曰

韓侯受命平在朔易北方之強制以全策亘漠橫塞揭

茲雄壁如三鬪龍躍出大澤並分襟帶各閉風雷俯視
陰山仰看昭同一夫登陴萬里洞開日晏秋盡纖塵不
來時維韓侯方運神妙觀釁則動乃誅乃弔廓乎窮荒
盡日所照天乎未贊不冊清廟我聖耀德罷局北門優
而柔之用息元元曷若完守推亡固存于襄于夷永裕
後昆

故太子少保贈尚書左僕射京兆韋府君神道

碑銘

并序

山之大者匿峯巒含氣象積高無倪而不見其險孕粹

有物而不知其神此其所以爲大也德之全者毀圭方
點皎厲靈機密運而智不驚愚遐標特立而迹無變俗
此其所以爲全也然則大山高而可陟全德近而難知
我求其倫見之於少保公矣公諱某字某京兆杜陵人
其先帝堯光宅讓德儲慶建國命氏列于夏商相胄卿
族繁于漢魏代濟不殞煥爲盛門大王父諱某皇朝主
客郎中萊濟商三州刺史王父諱某倉部郎中太原少
尹贈祕書監烈考諱某檢校都官郎中嶺南節度行軍
司馬贈同州刺史或以瑚璉之器纔施郡政或以巖廊

之姿僅及戎佐與時俱息從道而污屈不試於當年啓
莫京於身後公生而岐嶷弱而老成渾粹不散清明虛
映朱紘遺音而宮商自韻大圭不琢而符彩溢發邈是
天爵爛乎人文鼓鐘之聲日遠鄉曲之譽來逼釋褐太
子正字與仲弟正卿以賢良偕徵策入異等鴻冥雙舉
當代榮之授高陵主簿遷監察御史改殿中內供奉東
都畱守判官卽拜東臺侍御史參畫惟允持繩不同河
洛之間風聲尙在德宗躬決庶政本于尙書責成曹郎
綜練材實薦出方伯時超貳卿二十年閒斯爲極選公

由是前後遷刑部吏部員外郎吏部郎中奏議推美彌
綸成績南宮之故事存焉于時戡復日近勲勤者眾都
市惰遊盡垂金組邦畿豪奪半賜丹書輕禽逸於疎網
悍馬駭於柔轡上思懲抑必俟良能公由是前後歷奉
天長安二縣令仁護鰥惇智鈴豪右輿人之遺詠在焉
望由實躋任以望重選曹未幾給事于中旣居駿正之
司不撓當官之論屬東南歲歉俾乂惟艱出爲常州刺
史天寶之後中原釋耒輦越而衣漕吳而食一隅重困
五紀于茲公臨之清貞結以忠恕給存惠寡務穡勸分

一法以去其侵漁多方以備其災患以逸道而使繕完
允濟以與道而取賦入先期聲聞天朝考績連最轉蘇
州刺史二境之間百里而近靈源自出殊派共清膏澤
所需異壤同潤下車朞月報政如初加秩賜金借畱累
歲無何彭沛喪師兵驕地偏安危所繫朝議難之乃以
公檢校祕書監兼御史中丞賜紫金魚袋充徐泗節度
行軍司馬重其威望將委旄鉞而未命程伯徐方之軌
旣同不見賈生宣室之徵遽至擢吏部侍郎倫品甄明
通簡節適勢有探湯之熱我以靜濯眾有鼓簧之喧我

以心聽馴致其美闇然日彰不求無失職之人人自以爲不失職矣輟拜京兆尹德刑交修寬猛相濟匪設鉤距物無遁情匪耀鋒鉞機無滯斷浩穰之理不肅而成不求有不欺之吏吏自以爲不能欺矣俄改太子賓客辭劇就閑圖南之勢一息選德求舊居東之命惟重遷檢校工部尙書兼御史大夫充東都畱守東都畿汝州都防禦使自盜起幽陵兵屯諸夏涉淮而北軍國異容分陝以東古今殊寄公講信修睦外張保釐之政完備訓戎內寓折衝之令矛戟不露德輝藹然遐邇傾首以

承風强暴革心而知懼今上嗣統就加檢校吏部尙書
方入僉諧屬毗大化不幸嬰疾表求退歸優詔除太子
少保冀其休復將有後命神祇竟昧藥禱無降以元和
元年二月十二日薨于東都履信里之私第享年六十
有四寵贈尙書左僕射轎車西歸制使賻弔太常褒議
諡曰某公哀榮備矣夫人河東裴氏侍中耀卿之孫給
事中皋之女德門鍾美淑聞充塞薜榮早落蓍兆叶期
卽以是年五月二十一日合葬于萬年縣高平鄉少陵
原禮也公孝悌天至行有餘力仁義性得匪俟伏膺不

飾表以近名恆縱心而中矩清虛簡淡而應物不倦通
曠夷易而及門無雜不尙意氣而然諾篤至不好臧否
而鑒識超倫與故相國齊江西映穆宣州贊贊弟侍御
史員爲文章道義之友可以視其所親矣今吏部郎中
扶風竇羣抗迹毗陵退身進道公三挹郡榻之上一振
天墀之下不數歲閒蔚爲重器可以視其所舉矣分正
東郊開府辟士則有今右司郎中燉煌段平仲倉部員
外郎安定皇甫鎛禮部員外郎清河張賈京兆韋嗣隴
西李景儉中山衛中行平陽路隨皆羣彥之秀出一時

之高選可以觀其所任矣加以志尙幽遠冥搜好古所
居第內必有松石之致退公暇日常以圖籍自娛一字
愜心金玉不顧片言同趣布褐無閒疊疊然若見道之
所存陶陶然不知歲之云晏於戲策名從事四十餘年
朋友罕聞得喪之言家人莫見喜愠之色坦懷以處推
分而行無怨於人人亦不怨無猜於物物亦不猜履信
順以優游保福祿以終始其名教之大雅者歟有九子
長曰元質前常州義興縣尉次曰穀前邠州司倉次曰
璋鄉貢進士能修辭立誠克家致美茂揚風訓休有令

聞次某^其等皆殊姿異識發於童齒慶善之餘也以某
獲窺牆仞見託篆述究賢人之業信而無媿申孝子之
志直而不文其詞曰

利建于商介圭作寶爰立于漢緇衣改造克昌厥允奕
世載考亞尹擅名郎中懷道莫躋貴仕莫享難老蘊靈
儲休以啓少保丕顯少保其德悄悄有倬遐姿曠哉靈
襟顯仁山立藏用淵沈煦如冬陽藹若春陰白圭三復
克保明心黃鍾九變莫匪和音靜專動直謙進柔克宜
踐公輔以楨王國促路頓軌中天墜翼少陵古原拱樹

寒色穹壤可弊唯名不息金石垂之以慰罔極

唐故金紫光祿大夫檢校兵部尙書使持節都
督秦州諸軍事兼秦州刺史御史大夫充保義
軍節度隴西經畧軍等使上柱國彭城郡開國
公食邑二千戶贈尙書右僕射中山劉公神道

碑銘

并序

武有七德以先九伐聖王所以經邦也戰有六器以先
五兵賢侯所以述職也然威德並運仁勇相宣功業見
乎禮義之門將相出乎詩書之府若有覽古成敗與時